

1 Timotius

Paulus nakerek dala uluk bodik belun Timotius

Paulus foo tabe

¹⁻² Timotius mak di'ak!

Tabe nosi ha'u, Paulus. Ha'u ne'e Yesus Kristus klosan, tuir Na'i Maromak hakaran no Yesus Kristus hakaran. Ita haloon baa Yesus Kristus, tan Na'i Maromak sori nola ita nosi itakaan salan.

Timo! Tuir ha'u, o nu'u ha'ukaan oan du'uk, tan ha'u mak katudu dalan, to'o o fiar Kristus. Ha'u kamulak baa itakaan Ama Maromak no itakaan Na'in Yesus Kristus, nebee natudu laran di'ak nodi foo moris dame no manek baa o.✧

Sintidu baa ema mak nanorin kale'uk

³ Hori hirak nia, ita rua hamutuk iha kota Efesus. Oras ha'u atu kbaa rai Makedonia, ha'u kamaus o mein iha Efesus, tan noo ema balu mak nanorin ema sarani sia nodi hanorin kale'uk. Ha'u karuka o matuka mola ema mak nanorin kale'uk nia.

⁴ Sia soe butan leet nodi toe malu baa lia aikanoik bosok teen no lia husar-binan sia. Lia nunia soran ema dei, to'o sia la fiar baa Na'i Maromak.

⁵ Ha'u kfoo lia tate'an ne'e atu kanorin ema makfiar sia, nebee sia bele moris hadomi malu. Ita bele moris hadomi malu, kalo dadomin nia sai nosi itakaan neon moos, itakaan kakutak moon, no ita fiar tebe-tebes, la oin-kotuk.

✧ **1:1-2** Kristus Klosan Lian 16:1

⁶ Mais noo ema manorik balu mak sees nela ha'ukaan tate'an ne'e. Sia toe malu baa lia mak la noo folin.

⁷ Sia nalo aan nu'u ema mak matenek nanorin Ukun-badu Bei Musa, mais sia du'uk la natene Ukun-badu nia isin.

⁸ Ita hotu-hotu hatene Ukun-Badu nia, di'ak. Surak ita hala'ok tuir Na'i Maromak hakaran.

⁹ Na'i Maromak foo Ukun-Badu nia, lahoos bodik ema mak moris loos ti'an. Nia foo bodik ema mak sakar ukun, ema mak tokar lauk, ema mak se'i kotuk baa Maromak, ema mak nalo aat, ema mak la titu Maromak, ema mak naraik lia moon, ema mak no'o ema, no ema mak no'o inan-aman du'uk.

¹⁰ Nia moos foo Ukun-Badu nia bodik ema mak nalo lia kfo'er, mane mak toba no mane, feto mak toba no feto, ema mak nana'o ema nodi buka osan, ema mak tokar lauk, ema mak narai aan bosok, no ema hotu-hotu mak sakar hanorin loos.

¹¹ Hanorin loos mai nosi Na'i Maromak Manfatin Di'ak mak Nia latan baa ha'u. Na'i Maromak nia, Beran Kaliuk. Etuk ita foti-hahaas Nia.

Paulus namulak nodi sera dodan baa Na'i Maromak

¹² Ha'u kamulak kodi sera dodan baa itakaan Na'in Yesus Kristus, tan Nia fiar ha'u no nakbiit ha'u to'o bele kala'ok Niakaan serwisu.

¹³⁻¹⁴ Tuir loos, uluk ha'u lahoos nunia. Ha'u kakara kahonu Yesus naran kodi kasusar ema mak tuir Nia, to'o ha'u ktonan kadodok sia. Ha'u kalo aat nunia, tan sei la katene dauk itakaan Na'in Yesus Kristus, no sei la fiar dauk baa Nia. Mais Nia la nalu'a ha'u. Nia nadomi ha'u, to'o

natudu laran di'ak baa ha'u. Nia fakar matakmalirin baa ha'u, to'o ha'u kbele fiar biit baa Nia, no kadomi ema hanesan Nia nadomi ha'u.✧

¹⁵ Noo ema mak dale na'ak, "Yesus Kristus mai raiklaran ne'e atu sori ema maksalan." Tebes! Nosi ema maksalan hotu-hotu, ha'u ne'e mak aat kaliuk.

¹⁶ Masik ha'u aat nunia moos, Na'i Maromak la kastikar ha'u, tan Nia nakara nalo ha'u baa knaninuk atu natudu na'ak, Yesus Kristus neon naruk baa ema aat nu'u ha'u ne'e. Hodi nunia, ema seluk sia moos bele fiar baa Nia no simu moris nima-nimak no Nia.

¹⁷ Tonu Na'i Maromak!

Nia mesan dei, mak Maromak.

La noo ida seluk!

Nia kaer ukun hori nima-nimak to'o nima-nimak.

Nia moris hori nima-nimak to'o nima-nimak.

Nia la natene mate.

Ema raiklaran la bele titu nola Nia.

Kneter no tonun hotu-hotu, sera baa Nia!

Kneter no mose hotu-hotu, latan baa Nia! Tebes.

¹⁸ Oa Timo! Ha'u katak lia ne'e sia baa o, nebee o mala'ok iha okaan serwisu. Lia ne'e sia tuir saa mak Maromak mako'an sia dale kedan kona baa o. Kalo o malo tuir mako'an sia lian malo moon, o hanesan sondadu mak natene natuda sakar a'aat.

¹⁹ Fiar metis baa Kristus. Daka okaan neon, nebee moon nohuun. Noo ema mak la rona siakaan neon ain botu, to'o nadodok siakaan fiar, hanesan roo sa'e tan fatuk moris.

²⁰ Himeneus no Aleksander siakaan fiar, nunia ti'an! Tan baa nia, ha'u klatan sia baa diabu

✧ **1:13-14** Kristus Klosan Lian 8:3, 9:4-5

ulun, atu kanorin sia nebee keta nahaat Na'i Maromak naran.

2

Hamulak lala'ok

¹ Oras ne'e, ha'u atu kahuu foo lia tate'an nune'e: Hamulak bodik ema hotu-hotu. Kalo emi se'i oin baa Na'i Maromak, hakro'an nebee Nia tulun ema susar sia. Hamulak hodi sera dodan baa Nia, tan Nia laran di'ak.

² Hamulak bodik na'in no ulun sia. Hodi nunia, ita hotu-hotu bele moris mamatek no dame, tuir Na'i Maromak hakaran. Tan moris nunia, fatan bodik ema mak lo'u-sudur baa Nia.

³ Hamulak nunia moos kona baa Maromak neon. Nia, itakaan Maksorin

⁴ mak nakara sori ema hotu-hotu. Nia moos nakara ema hotu-hotu natene hanorin loos. Hanorin nia, nune'e:

⁵ Na'i Maromak, ida dei.

Ailalete moos, ida dei. Ailalete nia, mak Yesus Kristus. Yesus Kristus mak nalo Na'i Maromak laran malirin baa ita ema raiklaran.

Yesus, ema raiklaran nodi aan.

⁶ Nia latan isin lolon atu sori ita nosi itakaan salan.

Maromak Niakaan oras to'o ti'an atu nalore hanorin nia baa ema hotu-hotu.

⁷ Tan baa nia, Nia boi nola ha'u kdadi klosan atu kbaa katak ema mak lahoos Yahudi sia iha fatin hotu-hotu, kodi kanorin sia nebee sia fiar baa Na'i Yesus no moris tuir dalan mak loos. Saa mak ha'u katak ne'e, tebes no loos.✧

✧ 2:7 2 Timotius 1:11

⁸ Ha'u kakara nune'e: Kalo emi libur malu atu hamulak, emi musti di'a-di'ak ho malu. Keta hirus malu. Keta toe malu. Kalo foti liman atu hamulak, emikaan neon musti moos.

⁹⁻¹⁰ Nunia moos, fetu sia. Ha'u kakara nebee sia nahulin isin lolon nalo fatan. Tau faru mak noo kneter. Sia keta natudu lisan nebee ema natutuk matan baa sia tan siakaan fuuk ilas oi-oik, lale, siakaan faru folin todan mak la noo kneter, lale, sia nafutar aan liu resik nodi meanmutin no morteen. Lia mak nalo fetu kabaas, lahoos nunia. Lia mak nalo fetu kabaas, mak ne'e: siakaan hahalok di'ak no siakaan neon moon. Lia nia mak fatan bodik fetu mak lo'u-sudur baa Na'i Maromak.✧

¹¹ Kalo emi ema sarani libur malu atu rona hanorin, fetu sia musti tuir ukun nodi rona hanorin nia di'a-di'ak. Sia keta mu-muun.

¹² Tuir ha'u, la kona, kalo fetu sia nasa'ek aan to'o ukun mane no nanorin mane. Di'ak liu, fetu sia mamatek dei.

¹³ Tan Na'i Maromak nase'i uluk Adam, foin nase'i Efa.✧

¹⁴ Lahoos Adam mak kona be'ur uluk nosi diabu ulun, mais fetu. Nahuu hori oras nia, ema raiklaran nakur Na'i Maromak ukun.✧

¹⁵ Masik nunia moos, fetu bele netan moris, tan nahoris oan.* Surak sia fiar baa Yesus Kristus,

✧ **2:9-10** 1 Petrus 3:3 ✧ **2:13** Lia Uluk Fohon 2:7,21-22 ✧ **2:14**

Lia Uluk Fohon 3:1-6 * **2:15** Ema matenek lia Hakerek Moon na'ak 'fetu bele netan moris tan nahoris oan' noo lia isin hira mak ne'e: 1) Noo Oan ida, mak Yesus. Nia buka dalan nebee ema hotu-hotu bele netan moris. 2) Efa mak kona be'ur to'o nalo sala, mais nia moos dadi bei uluk bodik ema raiklaran hotu-hotu. 3) Fetu mak moris fatan la mate baa oras nahoris (mais lia isin ne'e la biit).

sia moris nadomi malu, sia moris fatan bodik Kristus eman nodi neon moon.

3

Klala'ok boi ema sarani ulun

¹ Noo ema mak dale na'ak, “Kalo ema ida nakara dadi ema sarani ulun, ema nia boi serwisu mak di'ak basuk.” Tebes.

² Mais ema sarani ulun lala'ok musti nune'e: Nia naran morin. Nia moris moon no feen ida dei. Nia natene netu aan. Nia mamatek. Ema nakneter nia. Nia simu bainaka nodi laran maluak. Nia natene nanorin ema seluk.

³ Nia lahoos tua lanuk teen. Nia lahoos makta'e ema. Makonak liu basuk, kalo nia ema mak laran di'ak, mak nakara dame, no la rotus osan.

⁴ Nia musti bali uma kain du'uk. Niakaan oan musti nakneter no nanono baa nia.

⁵ Tan kalo ema la bele bali uma kain du'uk, oin nunabee bele bali Na'i Maromak eman sarani sia?

⁶ Kalo boi ulun, boi ema mak tuir Kristus kleur ti'an. Keta boi ema mak foin fiar. Tan ema oin nunia maus loko aan. Keta to'o Na'i Maromak deku nia, hanesan Na'i Maromak deku diabu ulun.

⁷ Ema seluk moos musti nakneter sarani ulun. Hodi nunia, nia la moe aan. Diabu ulun moos la bele fo'at naloti nia.✧

Ema sarani ulun sasi'an

⁸ Nunia moos ema sarani ulun sasi'an musti nune'e: Nia naran morin. Nia nanaan la karuak. Nia lahoos tua lanuk teen. Nia la naa sotir liu resik.

✧ 3:7 Titus 1:6-9

⁹ Nia neon moon. Nia kaer metin hanorin mak Na'i Maromak nalore ti'an baa ita ema makfiar sia.

¹⁰ Kalo emi atu boi ema sarani ulun sasi'an, leno di'a-di'ak uluk niakaan moris no niakaan serwisu. Kalo la noo sala, foin foti nia baa sarani ulun sasi'an.

¹¹ Ema sasi'an feen* moos musti moris fatan no di'ak. Musti moris la nahaat ema naran. Musti netu aan. Musti ema fiar nia.

¹² Sasi'an mane musti moris moon no feen ida dei. Musti natene bali uma kain du'uk. Musti naliku oan sia.

¹³ Kalo sarani ulun sasi'an naliku ema sarani di'a-di'ak, nanis ema hetak nakneter nia. Nia moos hetak naberan aan katak nosi niakaan fiar baa Yesus Kristus.

Lia tatuur nosi itakaan fiar

¹⁴⁻¹⁵ Timo! Ha'u kaloon, la kleur ona, ha'u kbele ma'i karee o. Mais kalo noo sasenin, ha'ukaan hakerek ne'e bele to'o uluk baa o. Kakerek ne'e atu foo katene baa o nosi lia Na'i Maromak ema uma laran siakaan moris lala'ok. Keta malu'a ma'ak, Na'i Maromak mak sia fiar nia, Maromak mak moris. Sia hanesan uma mak noo tatuur no kakuluk biit, mak tane Na'i Maromak hanorin loos.

¹⁶ Na'i Maromak loke ti'an lia funin boot nosi itakaan fiar. Itakaan fiar tatuur nia, nune'e:
Kristus namaan aan mai iha raiklaran ne'e,
nola ema raiklaran ilas hanesan ita.
Maromak Kmalar dadi saksiin na'ak,
Yesus ne'e, Ema Moon.

* **3:11** Lia fuan Yunani iha ne'e, noo lia isin tolu: 1) "ema sasi'an feen", 2) "feto" (feto hotu-hotu) no 3) sasi'an feto.

Maromak Niakaan makbukar lale'an sia naree
 Nia ti'an.
 Niakaan Lia keke lema ti'an, to'o baa ema iha
 fatin hotu-hotu.
 Iha rai hotu-hotu ema fiar Nia ti'an.
 Na'i Maromak foti sa'e Nia baa lale'an, hotu Nia
 nabesi aan iha fatin kneter.
 Itakaan fiar tatuur mak nia.

4

Sintidu baa ema mak nanorin kale'uk

¹ Oras ne'e, Maromak Kmalar katak malorek ti'an na'ak, nosi ikus ema sarani balu atu dudu itakaan fiar. Hotu sia tuir kukun mak be'ur ema raiklaran, to'o sia la'o sala no tuir diabu hanorin.

² Ema mak nanorin nunia, dale seluk, nalo seluk. Sia huun tolek teen no neon tomak.

³ Sia nanorin na'ak, ema keta hola malu. Sia moos naluli hahaak oi-oik. Tuir loos, Na'i Maromak nase'i hahaak, nebee ita mak fiar baa Kristus no hatene hanorin loos, bele haa hodi sera dodan baa Nia.

⁴ Hotu-hotu mak Na'i Maromak nase'i nia, di'ak. Keta haluli oi-oik. Simu dei hodi hamulak sera dodan baa Nia.

⁵ Tan Maromak Manfatin no itakaan hamulak, naloos hahaak hotu-hotu.

Yesus Kristus eman serwisu mak di'ak

⁶ Timo! Foo matene lia ne'e sia hotu-hotu baa mamaluk makfiar sia. Kalo o malo nunia, o dadi Yesus Kristus eman serwisu mak di'ak. Maromak Manfatin natudu dalan baa ita, nebee ita bele fiar baa Nia. Manfatin nia moos nalore hanorin mak loos no hanorin mak kale'uk. Tan lia nia, o musti kaer metin Manfatin nia hanesan haan mak nakbiit okaan isin.

⁷ Keta soe haat leet hodi dale karin mak la kona baa Na'i Maromak neon. Keta hanono ferik lekan dalen mak la noo huun dikin. Di'ak liu, bali isin lolon, nebee moris di'ak tuir Na'i Maromak beer.

⁸ Hatoman aan hakbiit itakaan isin, ne'e di'ak, mais folin oan ida dei.

Hatoman aan moris tuir Na'i Maromak beer, ne'e mak folin kaliuk.

Folin nia

lahoos baa moris raiklaran oras ne'e dei, mais to'o no moris ikus baa.

⁹ Tebes! Lia ne'e sia, tebes no loos! Rai baa neon, nebee keta malu'a.

¹⁰ Ita haloon baa Maromak mak moris. Nia, maksorin bodik ema hotu-hotu, kaliuk bodik ita makfiar. Etuk, ita serwisu harui aan maka'as bodik Nia.

¹¹ Timo, manorin lia ne'e sia hotu-hotu modi maruka ema nala'ok tuir.

¹² Keta foo leet baa ema naraik o, tan o sei nurak. O musti dadi knaninuk bodik ema makfiar sia, nebee sia tuir okaan dale, okaan hahalok, okaan lala'ok hadomi ema, okaan fiar baa Yesus Kristus, no okaan moris moon.

¹³ Oras emi sei hein ha'u kmai, keta malu'a leno Hakerek Moon bodik ema makfiar sia. Makbiit sia modi manorin sia di'a-di'ak.

¹⁴ Mala'ok di'a-di'ak okaan babelen mak Na'i Maromak foo baa o, baa oras ema sarani ulun sia namulak nodi nasa'e liman baa o ulun. Baa oras nia, sia nato'o Na'i Maromak lia mamenon kona baa okaan moris no okaan serwisu.

¹⁵ O musti madinas mala'ok lia nia sia! Nebee ema hotu-hotu bele naree okaan moris no okaan serwisu mak hetak di'ak.

¹⁶ Daka aan, nebee o moris loos no manorin loos nohuun. Kalo o moris nunia, Na'i Maromak atu loke dalam baa o mo ema sia mak nanono baa o. Hodi nunia, emi bele moris nima-nimak ho Na'i Maromak.

5

Klala'ok haliku ema sarani sia

¹ Timo! Keta de'an katuas sia modi maka'as. Mais dale baa sia modi kneter, hanesan o dale baa o aman du'uk. Foo babiit baa mane nurak sia, hanesan mane malun du'uk.

² Dale baa ferik sia, hanesan dale baa o inan du'uk. Dale baa fetu nurak sia, hanesan dale baa o feton du'uk. Okaan neon musti moos baa sia.

Lia fetu faluk

³⁻⁵ Ema sarani musti tulun fetu faluk mak ema lalek. Mais fetu faluk mak noo oan no bein oan, oan no bein oan sia mak musti naliku fetu faluk nia. O musti manorin ema sarani sia, nebee sia natene selu siakaan fetu faluk kolen. Tan hahalok nunia, kona baa Na'i Maromak neon. Mais fetu faluk ema lalek, la noo ema naliku. Loron-kalan nia naloos loos baa Na'i Maromak nodi nusu tulun baa Nia dei. Fetu faluk oin nunia, ema sarani sia musti naliku.

⁶ Mais fetu faluk mak moris nafurak aan, masik nia sei moris moos, nia la noo folin.

⁷ Manorin lia nia sia hotu-hotu baa ema sarani sia, nebee ema seluk la dale nahaat siakaan naran.

⁸ Kalo ema ida la no'uk naliku familin du'uk, kaliuk ema uma laran du'uk, nia soe lakon niakaan fiar baa Na'i Maromak. Ema nia aat liu tan ema mak la natene Maromak.

⁹ Kalo boi fetu faluk atu dadi sarani ulun sasi'an, niakaan lala'ok musti nune'e: niakaan otas la bele tuun nosi tinan neen nulu. Uluk, nia moris loos no la'en ida dei.

¹⁰ Ema natene nia laran di'ak. Nia naliku oan sia di'a-di'ak. Nia laran maluak. Nia tulun makfiar sia nodi serwisu ki'ik sia. Nia nakara tulun ema susar. Nia nodi liman rua tulun bei-beik ema mak nalo lia di'ak.

¹¹ Keta boi fetu faluk nurak atu dadi sarani ulun sasi'an. Keta to'o sia nakara noo la'en tenik. Hodi nunia, sia la noo leet naliku ema sarani.

¹² Tan sia la noo leet nunia, sia nahaat siakaan mamenon mak uluk sia nameno iha Na'i Maromak oin. Ema moos atu nasalak sia.

¹³ Keta to'o sia nahuu baruk, hotu nalau aan tama-sai uma, dale nahaat ema naran. Aat liu tenik, kalo sia baa kahur ema seluk lian, no dale lia mak la makonak.

¹⁴ Di'ak liu, fetu faluk nurak sia noo la'en tenik ona, nebee nahoris oan no naliku uma kain du'uk. Hodi nunia, ema mak funu ita, la netan lia krarain atu nadois itakaan naran.

¹⁵ Tuir loos, noo fetu faluk nurak balu mak la'o sala dalan, tuir diabu ulun dalan.

¹⁶ Bodik fetu makfiar sia, kalo noo fetu faluk, sia mak musti naliku fetu faluk nia. Keta habusik ema sarani seluk mak naliku. Hodi nunia, ema sarani seluk bele naliku fetu faluk ema lalek sia.

Lia ema sarani ulun

¹⁷ Ema musti hakneter ema sarani ulun mak naliku di'a-di'ak hutun sarani. Kaliuk, ulun mak narui aan nalore Maromak Manfatin, no ulun mak manorik.

¹⁸ Hakerek Moon na'ak, "Kalo hodi karau sama hare, keta hatoos nunun nebee bele naa."

Hakerek Moon moos na'ak, “Ema mak serwisu fatan netan kansera.”✧

¹⁹ Kalo ema tula sala baa sarani ulun, keta simu nunia dei! Musti noo saksiin na'in rua-tolu lian manesak, foin tetu lia nia.✧

²⁰ Tetu hotu ti'an, kalo ulun nia sala, de'an nia. Kalo nia sei nalo sala nunia bei-beik, de'an tenik nia iha hutun sarani oin. Hodi nunia, ema rumak sia la tuir niakaan lala'ok la makonak nia.

²¹ Mato'o lia lala'ok ne'e baa ema sarani sia. Keta fahir oin no keta kli'is. Na'i Maromak no Yesus Kristus dadi saksiin na'ak, oras ne'e ha'u karuka o ti'an atu mato'o lia lala'ok ne'e. Makbukar lala'an mak Na'i Maromak boi ti'an moos, dadi saksiin.

²² Keta lai-lais foti sarani ulun. Leno uluk niakaan moris. Kalo ema foti ulun mak la moon, hotu nia nalo sala, ema mak foti ulun nia moos, natiu nola sala nia. Tan lia nia, o musti daka aan nebee moris moon.

²³ Ha'u krona o kabun moras bei-beik. Di'ak liu, kahur wee no anggor ween oan ida, malo baa aitahan. Keta memu wee moon dei.

²⁴ Manoin! Ema balu salan malorek ti'an. Masik sia la to'o dauk makotu lia oin, ema hotu-hotu natene siakaan salan ti'an. Mais balu tenik salan, kleu-leur foin naksain.

²⁵ Nunia moos, ema mak nalo lia di'ak sia. Ema balu nalo lia di'ak mak naksain kedas. Balu tenik nalo lia di'ak, mak sei la naksain dauk. Mais kleu-leur, lia di'ak nia moos nanis naksain.

6

Lia ata no na'in

✧ **5:18** Hanoin Hikar Dalan Moris 25:4; Mateus 10:10; Lukas 10:7

✧ **5:19** Hanoin Hikar Dalan Moris 17:6, 19:15

¹ Ata mak fiar baa Na'i Yesus musti nakneter na'in. Hodi nunia, ema seluk la netan lia krarain atu dale nahaat Na'i Maromak naran no itakaan hanorin.

^{2a} Na'in mak fiar baa Na'i Yesus, niakaan ata sia musti nakneter nia bei-beik, masik sia hotu-hotu manesak iha Na'i Maromak oin. Ata sia musti naliku na'in nia di'ak liu tenik, tan sia hotu-hotu fiar bele-bele baa Kristus. Sia hotu-hotu moos musti moris nadomi malu.

Ema mak nanorin kale'uk no ema mak rotus osan

^{2b} Timo! Manorin lia ne'e sia hotu-hotu modi makbiit ema sarani sia, nebee sia nalo tuir.

³ Itakaan hanorin loos ne'e, dadi tatuur baa moris dalan mak tuir Na'i Maromak hakaran hotu-hotu. Ema mak nanorin seluk, dudu sees Na'i Yesus Kristus hanorin loos.

⁴ Sia loko aan, mais mamuk! Sia toe mamuk. Siakaan hahalok nunia nalo ema hirus malu, ema nakaat malu, ema dale nahaat ema seluk naran, no ema naneo aat baa ema seluk.

⁵ Sia tokar lauk bei-beik. Siakaan kakutak dois. Sia la titu lia loos. Sia naneo sala na'ak, kalo sia madinas tuir Na'i Maromak hakaran, sia bele soi.

⁶ Tebes! Kalo ita moris tuir Na'i Maromak hakaran hodi horan to'o no saa mak iha, ita hetan sotir boot hanesan ema maksoin.

⁷ Oras ita moris, ita mai mamuk. Oras ita mate, ita moos fila mamuk.

⁸ Surak, noo haan no tais, to'o ti'an!

⁹ Ema mak nakara soi, maus kona sokur, to'o monu baa kuak oi-oik, tan naneo soi dei. Hanoin oin nunia nahoris dinu no nadodok moris.

¹⁰ A'aat oi-oik moris tan ema rotus osan. Ema balu nabu'a osan nunia, to'o sia sees nela

siakaan fiar mak loos no nadodok siakaan moris du'uk.

Kaer metin hanorin mak o simu ti'an

¹¹ Timo! O ne'e, Na'i Maromak niakaan. Tan baa nia, o musti moris nune'e: Moris moon, dook mosi lia aat hotu-hotu. Tuir Na'i Maromak hakaran hotu-hotu. Fiar baa Yesus Kristus beibeik. Madomi ema hotu-hotu. Materus aan mo susar. Moris furak mo ema hotu-hotu.

¹² Marui aan tebe-tebes atu mala'ok hanorin hotu-hotu mak ita fiar. Na'i Maromak foo moris nima-nimak baa o ti'an. O katak sain ti'an okaan fiar nunia iha ema lear oin. Dadi kaer metin moris nima-nimak nia.

¹³⁻¹⁴ Oras ne'e, ha'u kusu o mamate menon ma'ak, o tuir Na'i Yesus ukun hotu-hotu. Keta makur ukun ida moos, nebee ema la netan okaan salan. Tuir tebe-tebes, to'o loron itakaan Na'i Yesus Kristus namaan aan mai nikar. Ha'u kusu o mamate menon nunia iha Na'i Maromak oin. Tan Nia mak foo kmalar bodik makmoris hotu-hotu. Ha'u kusu o moos mamate menon nia iha Yesus Kristus oin. Tan Nia moos katak lia loos iha Gubernur Pontius Pilatus oin.✧

¹⁵ Na'i Yesus boot kaliuk, beran kaliuk!

Na'in baa na'in hotu-hotu.

Ulun baa ulun hotu-hotu.

To'o niakaan oras,

lia ne'e sia hotu-hotu naksain.

¹⁶ Nia mesan mak la mate.

Nia moris iha kroman mak ema raiklaran la bele terus.

La noo ema raiklaran ida kois mak bele titu nola Nia.

Sera kneter hotu-hotu baa Nia nima-nimak!

Nia kaer beran hotu-hotu iha liman nima-
nimak!

Nunia tebes!

Lia ema maksoin

¹⁷ Timo, katak baa maksoin raiklaran ne'e ma'ak, keta loko aan no keta hakrai aan baa sasoin. Tan sasoin hotu-hotu atu lakon mohu. Di'ak liu, hakrai aan baa Na'i Maromak mak moris. Tan Nia mak fakar tuun hotu-hotu bodik ita, nebee ita bele horan moris furak.

¹⁸ Katak baa sia nebee sia nodi sasoin nalo lia di'ak. Nebee, sia madinas natudu hahalok di'ak. Nebee, sia laran maluak baa ema. Nebee, sia fa'e matak-malirin mak Na'i Maromak foo baa sia.

¹⁹ Hodi nunia, sia nariik moris mak folin, tan sia babilan kedan bodik moris baa awan-wainrua.

Paulus narohan hakerek

²⁰⁻²¹ Timo! Daka di'a-di'ak Manfatin hotu-hotu mak Na'i Maromak rai baa o. Ema balu naneo na'ak sia mesan mak matenek. Mais siakaan 'matenek' nia, la noo tatuur, tan sia fiar hanorin kale'uk. Keta manesa lia fuan mo sia. Keta kahur ho bosok teen sia. Keta dale lia mak la tuir Na'i Maromak beer.

Ha'u kakro'an nebee, Na'i Maromak natudu laran di'ak baa o.

Nunia dei.

Dame,

Paulus

Tetun Alkitab
Genesis and the New Testament in the Tetun Belu
language of Indonesia and East Timor
Kejadian dan Perjanjian Baru dalam bahasa Tetun
Belu. Genesis eo Novo Testamento em língua Tétum
Belu.

copyright © 2013 Unit Bahasa dan Budaya

Language: Tutun Belu (Tetun)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

66336204-8208-5358-97ab-2b85b8c3392e